

**1055.**

1462 September 13

***Hans Trutler macht sein Testament.***

*fol. 199r* Actum secunda feria post nativitatis Marie anno domini etc. LXII ist vor eyn siczindin rath komen Hans Trutler, lynewebir, und hat irczalt, wy er eynen naturlichen son hab, der sich umbe synir selin seligkeit willen keyn Erfort in eyn geistlichin orden gegeben hat. Also hat er vor uns uszgesagit, so er von todis weyn wurde abgehin, so sal er an synem gelaszin gutirn synen erbeil, also vil also synir tochtir geburen wurde, auch czu erbeil nemen und syne eewirtin und syne tochtir sullin ðm daz nicht wegirn und an eynttrag laszin folgen.

**1056.**

1462 August 15

***Gerichtliche Einigung über das Erben von Jacof Begken und die Versorgung der hinterlassenen unmündigen Kinder.***

*fol. 199v* Hans Rothe, Peter Jocoff, Michil Walther, Wenczil Wechseler und Nickel Oszing haben bekanth, daz sy eyne richtung und eynikeit beteidigit und gemacht haben czwischen Merten Sneidir und Nickel Huthir in vormundeschaft Jocoff Begken seligen unmündigen kyndere uff eyne und Peter Huthin, Jocoff Begken eydin, in vormundeschaft seyns elichen weibis, der kindir swester, uff dy andir syten und haben dy behuszung an sant Katherinan kirchin und der unmündigen kyndir farinde hab Peter Huthin vorkaufft und angeslagen vor vierunddriszig nuwe ß gr und ander barschaft hat er synen teil und auch dy vormunden der unmündigen kyndir teil irhalten. Und Peter Huth sal seyns weibis geswistern vor ire gebure am husze und an der farindin habe reichen und bezalen czweiundriszig nuwe ß gr, dy sal er den kynden reichen und bezalen iczlichem synen teil, so es czu mündigen jaren komet, und mit muncz, waz dy czeit in den landen genge und laufftig seyn wirdit und sal auch dy czwei jungstin kyndere bey om behalden, mit essin, tringken und tegelichin cleidirn nach moglichkeit unbeschedit irem hauptgelde, bisz sy czu mündigen jaren komen, vorsorgen. Sulchin kauff Peter Huth in vormundeschaft seyns elichin weibis und Mertin Sneider und Nickel Huthir also vormunden der andirn kindir vor jowurt und wy daz beteidigit und obingeschriben ist czu halden gereth und globit haben, daz stet und unvorrugkit czu haldin. Actum dominica post Laurenty anno domini etc. LXII.